

條

麓

堂

集

條麓堂集卷之六

表一

正旦賀表

三道

伏以三元啓泰青陽開紀鳳之端五位乘乾紫極拱飛  
龍之度萬物資始天地和同四表宅心華夷歌頌恭惟  
皇上道竝三光仁涵庶類撫璿璣而齊軌調玉燭以當  
陽頌朔八荒化已徵于獻雉履端四始惠何屑于放鳩  
卜曆將運于億萬斯年纂統已及夫三十四載斗柄指  
攝提而易建歲元合單闕而更端太常肅九賓之儀宗  
伯具三朝之典朱干玉戚庭燎宵輝玉輅金根陞儀晨

列天開閭闔拜萬國之衣冠風動簫韶舞兩堦之干羽  
玉闕銅柱逖清漢塞之塵白叟黃童共擊唐封之壤故  
三千之壽域五福攸同遊億兆于春臺一人有慶此誠  
景命維新之會足為降年有永之徵也臣等遙跡鵷聯  
傾心默舞譬諸草木曷酬四序之功如彼丹青莫繪兩  
儀之狀伏願日星為紀造化為徒雨暘寒燠以時茂對  
貞元之會歲月日時無易載迎泰運之休青宮闢而湛  
潤星輝黃道熙而天長地久臣無任

又

伏以鳳紀三陽寶曆衍履端之序龍飛五位璇圖握正

始之符蒼精應氣於攝提黃道開祥于閭闔嘉生有俶  
陽道昭亨天地春回神人慶洽恭惟皇上纂風淳穆邁  
德希夷七政以授人時益懋幾勅之戒六計以稽吏治  
載嚴黜陟之規以正以殷四時不忒若工若采庶績咸  
熙內順治外威嚴沛然溢乎德教家詩書戶禮樂煥矣  
其有文章當三紀之化成屬四始之首歲風回玉律聲  
調太簇之中象轉璿璣氣協勾芒之令鴈候時而欲北  
風解凍而從東藻火粉彞居青陽之左个蒼龍驚輅迎  
盛德於東郊眷此三朝勤茲萬國龍庭日煖回春色于  
九重豹尾雲高覩祥光于雙闕丹書玉几丕闡神庥肅

慎越裳載光王會四方述職月受要而歲會成重譯來  
王水朝宗而星拱極歡聲載溢和氣旁孚總夷夏以歸  
仁暨蠲蠹而戴德自今三十五載茂對玉衡繼此億萬  
千年丕延寶命臣等久叨侍從曲荷恩光黼黻何能載  
簡有慙于玉署報稱莫既猷芹期效于華封伏願壽與  
天齊化隨陽長擬岡陵而介祉迓軒莢迎候之長協上  
下以承休邁姬鼎卜年之永祖功宗德九葉重光日照  
月臨萬年一統

又

伏以夏正明時四始協履端之序虞庭輯瑞萬方屬猷

計之期鴻鈞調氣於青陽寶籙迎祥於紫極一人有慶  
八表同春恭惟皇上懋德好生致和育物撫五辰而省  
歲肆筵休徵乘六龍以御天式孚大始纂穆風于邃古  
訖聲教于要荒仁享帝孝享親精禋旁達川獻珍嶽獻  
寶靈貺昭宣眷五位之集禧值三陽之啓候歲臨柔兆  
火德昭陽道之亨斗建攝提木氣遂物生之化寔惟上  
朔載舉元儀庭燎高張星聯陞楯金輿遙下雷動文塤  
瑞靄娜雲擁爐烟于雙闕祥麟威鳳儀清樂于千門鵷  
聯肅虎拜之班象譯萃鳥言之長黃童白叟百年興擊  
壤之謠銅柱玉門萬里絕鳴弦之警茲蓋聖人道化之

久三踰紀而彌光昊天眷命之新萬斯年而未艾也臣  
等叨參密勿久荷生成藿葉傾忱仰光華于舜旦椒花  
辦頌祝富壽于堯年伏願泰運有常乾行不息統迎軒  
笑永為天地神人之依福衍箕疇適綬祿位名壽之備  
聖躬天保俾熾而臧帝載日熙既安且樂

冬至賀表

三道

伏以日圭舒景于彤霄三至撫光時之正天統肇祥于  
紫禁萬年迎軒筴之長律呂協而感淑氣于鴻鈞甲子  
交而建曆元于鳳紀永介升辰之景福備陳亞歲之隆  
儀品彙尊萌百工懽忭恭惟皇上淵默凝神中和贊化

察璇璣而齊政動靜見天地之心膺寶籙以延禧齋戒  
御陰陽之定陶甄四國恩披廣殿之融風明炳萬幾光  
對中天之化日金鏡燦而歲月日辰無易玉燭調而兩  
暘寒燠以時文義立武功宣東漸西被暨朔南之聲教  
超乾圖溢坤牒岳輸川效萃動植之禎祥茲者序屬殷  
冬天開周正黃鍾應候一陽生鳴鳳之笳白璧交暉兩  
曜會牽牛之度天倪動而庶物資始荔挺芸芳乾度轉  
而辰緯相從珠聯貝結矧啓天運履長之首適當聖人  
道久之期化國之日舒以長刺繡乍增于一線治世之  
音安且樂考聲更叶于八能欽福錫極而凌室納冰六



氣謹人時之授明德達馨而泰壇升燎三元承天紀之  
新清臺書嘉應于五雲迓天庥之滋至玄象驗大來于  
七日徵君道之方亨是為寶曆有俶之昌辰而實璿算  
無疆之顯慶也臣等荷生成之有自媿獎理以無功瞻  
丈三之晷以迎長倍有傾葵之悃依尺五之天而上壽  
敢伸獻履之儀伏願道與陽升化隨日長茂對時以熙  
至治而復而臨而泰而壯六陽寢盛圖八表于同春永  
保命以固丕基曰元曰會曰運曰世三統循環參兩儀  
以竝壽

又

伏以羲象陽生三至肇天開之統軒齡筭衍萬年迎日  
至之庥通遵亞歲以陳儀茂對升辰而納祐歡騰紫禁  
慶滿黃輿恭惟皇上德契重玄道超太始希夷象帝動  
靜見天地之心沕穆存神齋戒御陰陽之定撫五辰以  
齊七政乂三德以驗庶徵文義立武功宣巍乎成功大  
備一王之制天瑞降地符出煥然景貺聿集諸福之祥  
茲者星昴方中地雷初動黃鍾應候一陽生鳴鳳之簫  
白璧聯暉兩曜會牽牛之度淑景漸紓于黃道蕃禔茂  
介于紫宸五緯相從珠連貝結百昌有俶荔挺芸芳吹  
葭飛緹室之灰揆表引土圭之景泰壇陳璧崇大報于

三元朔易開闢廓游氛于八表寶粒播千箱之頌商雲  
書五色之光白叟黃童歌舒長于化國融風瑞雪叶嘉  
應于禎圖蓋四十三載之靈期隨元陽而共長而百萬  
千齡之景籙同穹昊以無疆者也臣等叨侍近班忻逢  
令節才輕補襪無稱一線之長願切呼嵩倍有萬年之  
祝伏願聖躬天保仙算日增闔坤軸闢乾機由復而臨  
而泰而壯品物流形永戴周王之壽考廓天紘拓地紀  
自畿而甸而要而綏八荒奉朔常依商邑之尊嚴

又

伏以璿樞運化一陽肇復于黃宮寶籙迎長萬歲乘乾

于紫極景緯聚鉤陳而灼彩融風披閭闔以生春慶靈  
敷五色之華祥光日麗寶曆紀三元之首壽域天開恭  
惟皇上虛白存神重玄合德妙幹陰陽之契六氣順而  
風雨時弘舒天地之心五穀熟而民人育文武擅張弛  
之用作述無明聖之功赫赫厥聲濯濯厥靈瞻明威于  
有截雍雍在宮肅肅在廟嚴至敬于不聞繁祉集而與  
日方新熙化衍而配天行健茲者斗杓直北日軫旋南  
雷轉地中茂履大來之慶景浮圭表式延長至之休柔  
荔挺芳芸生萬彙孳子垣而托始宮黃鍾商太簇八能  
諧律本以調元水脉動而不增川至之禧宮線引而茂

對升辰之祐霏霏瑞雪靈滋兆于豐年奕奕齋宮神貺  
成于不日八方塵謐四海波澄夜半升禋三至建南郊  
之典天中啓運九重奠北極之尊臣等荷洪造于清班  
覩隆儀于亞歲雍容盛美媿無授簡之三長遭際明昌  
倍有呼嵩之萬歲伏願瑤圖丕固玉眷郅隆化國之日  
舒以長蕩蕩平平歛敷錫之福于有極受祿于天嘉且  
樂皇皇穆穆申保佑之命于無疆

萬壽聖節賀表

六道

伏以五位凝休懋建乾元之治萬年衍慶載開震夙之  
祥式瞻紫禁之虹流快覩彤庭而虎拜兩儀闔懌萬國

尊親恭惟皇上睿智有臨聰明時憲重玄妙契希夷象  
帝之先一德潛孚嘉樂受天之祐撫五辰以齊七政又  
三德以驗庶徵川修貢嶽效珍表神庥于諸福水朝宗  
星拱極輯王會于殊方茲者玄宿殷秋壽躔見丙金天  
薦爽正白藏秉兌之期璇極迎祥值玄鳥生商之候鈞  
陳雲麗月貫瑤光閭闔天開日臨黃道淑氣均霑乎動  
植歡聲共暢乎華夷瑞叶六符率土仰璿璣之象功成  
九奏鈞天傳韶濩之音屬百祿之方增信一人之有慶  
臣等幸際貞元之會叨從耳目之司芹曝有懷敬上華  
封之祝埃塵莫報敢同嵩嶽之呼伏願天保萬年周王

壽考日新四表舜旦光華曰福曰壽而康寧歛皇極之  
五福博厚高明以悠久參化育于三才

又

伏以五百年而啓聖載逢繞電之辰八千歲以為春茂  
衍齊天之壽灝氣順成于萬寶休祥叶贊于三靈宸扆  
尊嚴撫貞元而御籙寰區熙皞合夷夏以騰歡恭惟皇  
上道妙函三神凝得一定中正仁義而主靜德冠帝王  
徵高明博厚以無疆化參天地以昭受上帝誕膺申命  
之休用敷錫庶民大溥歛時之福天瑞降地符出煌煌  
燁燁掩千古之珍圖內順治外威嚴蕩蕩平平囿八荒

於壽域茲者兌成屆節震夙開祥桂馥殷秋湛九天之  
素彩萸芳光砌紆十葉之靈華南極現而丁度晨輝北  
辰正而微垣宵燦風清閭闔萃百辟之冠裳雲擁鉤陳  
來萬方之玉帛邊氛告淨海波不驚永泰維蕃棲金穰  
于舜畝松苓滋茂迺寶筵于軒齡矧夫三秀之神芝寔  
產二親之世室當迎秋于有俶告卜筮以無疆周易書  
契以來巍巍然鮮聞匹儼凡有血氣之類欣欣爾莫不  
尊親臣等贊輔無能遭逢有幸敷皇極之曩訓近依天  
子之光詠天保之岡陵願上聖人之壽伏願皇圖日泰  
仙算歲增心和形和而氣亦和九五位迺和平之福天



大地大而道亦大億萬年綏大定之猷

又

伏以紫極延休寶曆衍隆昌之祚丹陵毓瑞金天開震  
夙之期祥虹襲甲觀以宵輝壽曜傍丙垣而旦現慶流  
夷夏歡動臣工恭惟皇上德合太清道通元始無為以  
守至正化順垂裳不宰而建大中治成指掌撫五辰以  
齊七政又三德以驗庶徵文義立武功宣穆穆綏八荒  
之旅天瑞降地符出煌煌集諸福之祥唯昭事不替于  
精禋益虔而益慎肆眷命丕申于保佑愈久而愈新茲  
者序屬三秋節臨萬壽仙萸露湛紆十葉于堯堦茂穎

星垂樓百嘉于舜畝五王三帛大庭陳王會之儀七鳳  
五麟閭闔抱卿雲之彩玉衡平而南北之烽烟盡熄足  
徵王道之成功璇璣正而春秋之風雨以時益見天心  
之助順且丁逢壬位水火妙合而章既濟之能兼卯會  
戌垣水土相得又著栽培之慶日辰則合符于歲曜景  
慶則正麗于殷秋凡此象數之奇無非壽考之應在百  
王所未覩迺衆妙之咸臻蓋年以引年懋算比天而共  
久旦兮復旦純嘏與日以方增者也臣等叨廁清班忻  
瞻景祚載述金鏡九重依天子之光祇薦瑤觴百拜上  
聖人之壽伏願凝和履一主靜順神八千歲以為春秋

閱綿曆于莊椿而自今伊始億萬載以承曆數迎景齡  
于軒筴而與古為徒

又

伏以壯闕泰長樞舍燦飛龍之象南郊秋曙極垣流降  
紀之輝當五百年茂對之辰協億萬載維祺之卜慶流  
夷夏懽洽神人恭惟皇帝陛下剛健齊天聰明作則靈  
承九廟祖宗歆膺饗之忱道暢八埏萬彙賴陶鎔之化  
闡茫茫之壽域日月光華登熙熙之春臺乾坤闔懌禮  
樂備明于三紀車書會同于四方氣應白藏允成屆候  
瑞闡赤室震夙綏休莫吐玉堦證初榮于十葉桃呈瑤

圉獻選算于千年齋宮膺景命之維新宗社衍洪圖之  
鞏固鉤陳露肅旌旄環虎拜之班閭闔風清鏘磬送鸞  
儀之曲水朝宗星拱極徵王會于越裳川獻寶岳效珍  
萃天符于玉几此寔昊穹眷德之顯圖而率土歸仁之  
景會也臣等絲綸跡忝贊頌心勞捧萬壽兕觥倍有周  
人之藎獻千秋金鑑媿無唐相之猷敬因華渚之流虹  
遙向彤墀而舞獸伏願箕圖衍福軒策迎長曰清曰寧  
曰貞參兩儀而奠位維忠維文維質總三代以乘時天  
壽益綿嵩嶽更聞于呼萬人和丕應華封再見于祝三

又

伏以誕靈華渚虹流開濬發之祥襲慶璿樞鳳紀衍維  
祺之祚壽曜騰輝于南極禎符叶應于北辰夷夏尊親  
乾坤閭懌恭惟皇上神聖統天希夷象帝無為以守至  
正化順垂裳不宰而建大中治成指掌撫五辰以齊七  
政乂三德以驗庶徵禮備樂和暢兩儀之協氣仁昭義  
立洽四海之歡心璇宇瓊章益虔禋祀玉衡金鏡懋集  
洪休乘五百年元會之交撫四十載明昌之運凝圖丕  
固受命維新秋仲旬初電統肇萬年之聖節火明木秀  
日躔臨五度之元辰於昭介壽之無疆益闡降年之有  
永仙葵露湛紓十葉于堯堦茂穎星垂樓百嘉于舜畝

聲教遙通于日窟威稜旁憺于冰天星拱極水朝宗萃  
萬國梯航之賁川效珍嶽修貢摠兩間動植之符蓋年  
以引年茂算比天而共久旦号復旦純釐與日以方新  
誠帝王之生有真而大德必得其壽者也臣等叨塵密  
勿久荷生成熒調何補于鴻猷舞蹈率先于虎拜心傾  
皇極幸依天子之光情效華封敢上聖人之壽伏願玄  
貺靈承仙籌荐衍億萬載以承曆數迎景齡于軒筵而  
與古為徒八千歲以為春秋閱綿曆于莊椿而自今伊  
始

又

伏以寶度增齡六甲啓週天之運瑶穹篤祐萬年逢誕  
聖之期龜疇欽嚮用之隆禧鳳紀衍有開之景祚乾坤  
闡懌萬寓同眷宗社莫安一人有慶恭惟皇上神凝得  
一道契函三天德出寧撫玄元之衆妙真功不宰綜軒  
后之百昌皇建極而蕩蕩平平天降康而穰穰簡簡鰲  
儀順軌六符顯象于泰階鯨海澄波八表歸仁于壽域  
保世滋大受命維新至誠無息而久斯徵令聞不已而  
得其壽暎此兌成之候寔開震夙之祥電統北極光映  
蒼龍之闕星明南極暉聯朱鳥之躔鶴鳴乎鹿兔朋來  
現玉階之上瑞油油爾黍苗旅獲薦瓊苑之豐年萬邦

奉賚以來王百辟稱觴而上壽歡聲喧而動地共看獸  
舞于虞庭榮光起以燭天獨覩虹流于昊渚昭哉景貺  
展也熙辰矧六十年之甲子初週又億萬載之春秋伊  
始爰肇曆元于有倬益占仙算之無疆臣等叨塵清切  
之班幸覩光華之旦揆天技短傾日情深效魯史之長  
編敬紀日新于萬載采周詩之美報敢陳天保之六章  
伏願福壽康寧威嚴順治乾行常健泰祉方來帝曆由  
四紀以滋綿咸五登三永奠岡陵之固仙甲自一輪而  
載衍踰千盈萬常同箕翼之明

聖節嘉穀賀表 二道



伏以景貺昭祥寶曆茂迎于軒筴嘉禾薦穎珍符叶應  
于周書萬年開虹渚之期九扈獻星田之瑞歡騰朝野  
慶滿乾坤恭惟皇上合德重玄凝神太素昭事上帝誠  
不替於時幾懷保小民心每存于稼穡察虞璣之七政  
而敬授人時錫禹範之九疇而懋建皇極爰致天心之  
克享益昭神道之幽通朱火候炎靈潤響答于霽禱金  
飈氣爽嘉生擢異于天疇紫芒含玉露之靈滋青穗散  
璇星之精液一莖雙秀已徵率育之奇三穎同株益闡  
降康之祉矯矯植龍枝于東極穰穰獲瓊粒于環丘甸  
師雀躍以奏功宗祝駿奔而薦祐馨香旁達九廟居歆

京坻豐成一人有慶蓋帝田是出既呈四十九本之奇  
而聖節適臨寔表億萬千年之貺此誠我皇上上壽齊  
天之大驗而至和育物之極功也臣等叨塵法從久荷  
恩私黼藻才疎莫狀無為之治紀述心切敢書大有之  
年伏願凝命維新奠圖益輦綏五典明五禮應五禾以  
大豐熙庶績釐庶官驗庶徵以咸若人用康而無思不  
服陳豳風流火之詩天保定而以莫不增介周雅如山  
之壽

又

伏以千齡啓旦方流虹渚之暉九扈登秋更薦星田之

瑞惟靈貺申休于軒算肆嘉生擢異于先年圖牒增奇  
臣民洽慶恭惟皇上清寧合德易簡成能齊七政而撫  
五辰百工咸若修六府而和三事九叙惟歌精禋夙夜  
以不遑稼穡春秋之是念上帝時享旁乎周德之馨下  
民用康備歛箕疇之福乾符坤貺歲異月新匪特集衆  
美于堦墀抑且孕至和于禁籞睠茲靈稼誕降中田剛  
接三推秀發青囊之種品殊百穀液分璇宿之精奇苗  
競競以垂雲既盈疇而積畝異穎煌煌而映日亦分兩  
以參三田峻驚觀司農奔奏星臨紫度正八荒開壽域  
昌辰帝賚金穰會萬寶告成之盛候時如有待物本知

仁化國屢豐由內苑以薄于四海聖人多壽自今日以  
引于萬年舉安庶物之生茂介一人之慶臣等叨塵家  
勿久荷栽培素飡何有于燮調深媿河干之詠玄造祇  
深于祝頌敢同嵩嶽之呼伏願寶曆增綿瑞圖益固天  
地大道大纂圖合大常同箕翼之明心和氣和形和  
氣錄和永撫璣衡之正

聖節白鹿賀表

伏以金篋錫齡載衍千年之景曆瑤光散彩適呈百祿  
之禎符惟天心祐聖以彌隆故物瑞應時而游至輝增  
圖牒喜溢臣民恭惟皇上道妙函三化鈞吹萬司神之

契希夷存無極之真襲氣之樞塊圠捕太和之運既順  
成于百物亦畢至于四靈久于道而時幾之勅不遑新  
其命而保佑之申孔固眷此沅虹之節發祥貫月之星  
有鹿甦甦其色皜皜鍾靈奧壤當堯從四子之區現瑞  
明庭適軒會群靈之日霜毫皎潔濯濯不驚玉角林離  
蹌蹌欲舞來從西極白環捧王母之符效祝南山赤籙  
上聖人之壽百工動色萬姓歡聲擾馴質于上林咀瓊  
芝而自適挺竒姿于靈囿偕瑤兔以稱珍此蓋神物得  
氣之最先來諗有開之吉上壽後天而不老預彰必至  
之徵者也臣等叨邇清光忻瞻殊瑞兩間燮理功莫贊

于鳳儀千載遭逢誠倍傾于獸舞伏願璿圖日固玉曆  
天長不愛道不愛寶不愛其情自生民以來盡發乾坤  
之秘藏得一清得一寧得一為正擅域中之大永膺華  
夏之尊親

白兔賀表

伏以紫度鍾祥景命茂迎于百福玉衡毓彩禎符式兆  
于千齡惟天眷聖而申休故物應時而荐祉竒增文囿  
慶叶堯年恭惟皇上德契元精神凝太素中孚發志贊  
二氣以成能无妄對時合萬物而並育駿烈丕昭于四  
表鴻猷卓冠乎百玉文義立而武功宣內寧外謐川效

珍而嶽修貢月異日新瞻此仙都寔興神物天誘其至  
當四十年熙皞之春神降厥祥具五百載純明之色滙  
精月窟奪采霜華不角不牙秀出中山之裔如珪如璧  
皎同舞鎬之輝餐禁苑之瓊芝爰爰自得侶仙宮之玉  
鹿濯濯不驚且卯位司靈既合符于聖誕而金精獻壽  
益顯示于天休是以昔歲自星渚而雙來正值瑶光之  
旦今茲由鳳山而再至重臨寶度之辰昭萬壽之無疆  
祥集紫籙信一人之有慶歡洽黃輿者也臣等叨侍清  
光忻瞻上瑞恩慚拔穎模擬莫效于雕蟲心切傾葵祝  
頌率先于舞獸伏願仙算日增聖躬天保日月合明四

時合序八千歲以為春秋天下一家中國一人億萬載  
永膺曆數

兔生毓賀表

伏以祥凝瓊苑至和昭茂育之仁彩散玉衡上瑞衍廣  
生之慶靈質妙諧于四象禎符式應于千齡朝野均懽  
神人胥懌恭惟皇上希夷象帝沕穆存神至誠默契于  
三靈熙氣昭蘇于庶類掩天紘亘地軸神功駿烈巍巍  
乎合二氣以同流發坤秘啓乾符上瑞奇祥燁燁乎冠  
百王而獨盛睠此中山之異堯寔惟景命之元靈夙呈  
皞皞之輝猷由星濬繼引生生之化蕃自天堦來馴方



洽于三期衍瑞再呈夫二耦一能分四影含素魄之清  
光子又生孫氣厚仙源之正派載披往牒未覩斯珍于  
考休釐厥惟上壽益兔司卯垣之度而生為永命之符  
茲生以更生現瑞既起于舞鎬將萬之又萬歷年迥邁  
于呼嵩者也臣等叨寵有年調元無補識奇文囿幸依  
天子之光效祝華封願上聖人之壽伏願瑤圖日固寶  
算天長熙四序擾四靈煥被堯光于四表撫萬邦綏萬  
福丕迎軒筴于萬年備膺祿位名壽之全永作天地神  
人之主

賀雨表

三道

以紫宸省歲齋宮肅雩祀之儀玄昊垂庥寰宇荷膏  
澤之潤廟神不舉有感必通朝野歡鈞太平有象幽明  
慶洽洪造無私觀美利于南訛敬掄揚于東觀恭惟皇  
上握紀統天撫辰正極調四時之玉燭齊七政于璿衡  
念小民之依爰知稼穡勅昊天之神不替時幾益璫圖  
已萬千三紀之餘而寶命將延于億年之久顧當首夏  
忽爾驕陽月不從星風惟終日睽茲南畝麥擢穎而未  
登自我西郊雲待簇而屢散仰厓宸慮深軫歲凶建大  
典于崇壇祈豐年于下土式增圭璧肆陳雲漢之章越  
徂郊宮用致桑林之禱禮時為大龍見惟期誠至斯乎

鸛鳴應候興雲有沛零雨其濛蒼蔚朝隤布濃陰于八  
表滂沱時降洒飛潤于四溟靈暉聿銷悵楚頓解來牟  
堅好獲月令之先秋廬井謳歌樂化國之長日茲蓋一  
人有慶徵曰肅以承庥百神效靈聖克誠而降祉者也  
伏念臣叨厠清班獲親瑞應報稱心切規摹莫狀于天  
工涵泳恩深涓滴能忘于帝力撰甘霖之賦冀嗣魯于  
唐臣紀大有之年敢續書于魯史伏願軒策延禧姬圖  
凝泰陽不愆陰不伏庶績咸熙十日雨五日風萬物竝  
育皇極建而歛時五福曰壽曰富以康寧王道昌而克  
配兩儀博厚高明以悠久

又

伏以雩壇崇啓方祗事于雷軒靈雨溥零遂亟回于天  
意感通甚速眷祐彌彰用諧萬寓之歡信是一人之慶  
恭惟皇上與天同德知民之依在上在旁對越不忘于  
夙夜省耕省歛憂勤時切于春秋永綏蒸民之生昭受  
三靈之眷既多受祉亦屢豐年乃茲夏令之方炎忽值  
驕陽之作沴雖微陰間布未洽于田疇而宸念獨殷深  
存于稼穡迺嚴茂典仰叩昊穹崇凝道之清軒致為民  
之秘禱至誠旁達靈貺昭臻山為出雲觸石而興層寸  
星有好雨離月而降滂沱掩八極以飛甘慰滿三農之

望挹四溟而洒潤行觀百穀之成全消疫癘于寰中遂  
洗禋氛于塞上頓成樂歲曾不崇朝蓋由我聖皇平時  
事帝之誠已孚于冥漠今此軫民之舉又極其精虔是  
召陰陽之和不待圭璧之罄篤哉顯祐灼矣禎符臣等  
久濡洪恩莫酬玄造用作霖雨媿燮理之無功瞻彼雲  
霄知感孚之有自伏願鴻圖益衍駿命恒新雨暘燠寒  
風各以其時玉燭光調于億載旬侯綏要荒咸遵其度  
金甌基輦于八紘

又

伏以誠融雩祀九重嚴省歲之儀應協嘉霖百穀遂有

秋之望幹元功于大造溥和氣于群生玄澤無垠堯年  
叶慶太平有象禹甸均歡恭惟皇上德合重玄神凝太  
素裁成輔相贊二極以成能肅乂哲謀撫庶徵而咸若  
謂民事莫先于稼穡而宸衷特切于康田茲者夷則肇  
秋驕陽成沴于彼原隰既螟螣之為災今此下民亦蘊  
隆而作癘聖心軫念殷祀虔修爰蠲洪應之齋宮式建  
精禋之大典靡神不舉有感必通一德神漠以潛乎百  
靈奔走以效職谷風習習隨巽命而敷陰零雨濛濛溥  
乾施而灑潤民乃夷而熒熒頓解禾盡起而穎粟可期  
薦瀨氣于白藏行覩西成之慶滌妖氛于玄塞永銷南

牧之塵曾不崇朝厥惟有歲茲蓋聖心沕穆先天而天  
不違是以玄貺昭融欲雨而雨斯應矧當萬壽聖節之  
首尤為三靈眷命之符合萬國之懽心誠一人之有慶  
臣叨塵法從久沐恩波摹天地而難名飲江河而自幸  
祇沃心之訓罔嗣美于商霖歌天保之章敢矢言于周  
雅伏願瑤圖日固璿曆夫長水火土穀惟修勸虞典之  
九歌而定命歲月日時無易欽箕疇之五福以錫民

賀雪表

四道

伏以帝敬格玄肅展勤民之禱天葩灑素丕昭佑聖  
符幹二氣以成能保群生而錫祉懽騰禹甸慶叶堯

恭惟皇上貞白凝圖虛明麗極均諧四序運灝氣于元  
樞宣暢八風鼓至和于大塊物無疵癘歲屢豐穰雖穹  
昊之錫羨彌昌而宸扆之對越益密念此三陽之月未  
霑三白之祥崇啓齋宮鴻典肇修于夙夜徧祈宮廟駿  
奔申命于臣工睠惟綏祐之隆重以明禋之感神機默  
轉嘉貺昭垂膚寸興雲混合乾坤之色盈尺降瑞繽紛  
甲子之朝棲太素于山川散靈滋于壠畝瑶林秀發氣  
不封條銀闕昭宣光惟承宇慰三農之望倉箱行詠于  
甫田消八表之氛童叟均陶于壽域臣等職聯密勿恩  
荷生成媿調燮之無功徒歌帝力知感通之有自仰見



天心伏願幽贊化以參三茂對時而育萬歛箕疇之福  
雨暘寒燠之各以其時迎軒筴之長山阜岡陵之必得  
其壽

又

伏以瑤壇肇啓精禋方建于九重玉眷昭垂嘉澤遽呈  
于六出眷二氣感通之會適一陽來復之初兆豐稔于  
堯年叶歡心于禹甸恭惟皇上握紀統元撫辰正極裁  
成輔相贊二極以成能肅乂哲謀驗庶徵而咸若勅時  
幾而不替昊天之命念稼穡而克知小民之依屬茲建  
子之辰忽值驕陽之候乃厯厯慮載闢崇壇祈二麥于

天宗敬致珪璧之享皇萬人于旦夕式陳雲漢之詩和  
氣迎祥至誠孚化霏微集霰初委璇璣淅瀝飛霰漸翻  
瓊藻暖重陰而益固覺積潤之潜通隴畝載滋山川同  
皜瓊幡玉節儼來姑射之仙銀闕珠宮宛在蓬萊之境  
螟蝗盡殪疫癘潜消普凝五穀之精慰滿三農之望此  
皆我皇上儲至精于物表與天為徒幹元氣于域中為  
民立命實重玄之顯貺而三白之休徵也臣等叨塵密  
勿久荷生成媿調燮之無能天工莫補知感通之有自  
帝力難名伏願寶命增隆瓊圖益固陽不愆陰不伏萬  
年迓穆穆之衡千斯倉萬斯箱四海莫生生之業皇極

建而歛時五福曰壽曰富以康寧王道昌而克配兩儀  
博厚高明以悠久

又

伏以誠融玉陛方虔禋祀之儀貺應瑤靈遂降繽紛之  
瑞惟聖德無幽而不達故天道有感而必通春滿乾坤  
歡均黎庶恭惟皇上合體重玄凝神太素中和位育參  
功化于兩間仁義生成溥甄陶于庶類解袞賜士玄塞  
歸仁出舍賑饑蒼生感德惟玄冥之季月屬元間之愆  
陽豈氣機或僭于天心迺民瘼獨厪于聖慮百神咸舉  
式乎雲漢之章六事既脩猶致桑林之禱惟帝衷之潛

遶肆天澤之昭垂寒風告期同雲生色初集惟霰灑潤  
瑶宮繼布斯零增輝貝闕寒不起粟豫占禾稼之豐氣  
不封條載卜螟蝗之盡誠足以見天人相與之微機而  
誠信感通之至道也臣等精白承麻如璋慙德堅貞勵  
節飄羽擬輕敷對齋宮報玉未酬于厚德抽思梁苑摘  
瓊英效于妍辭伏願宏敷駿澤益肇鴻圖欽若昊天時  
謹焚祥之察軫思邦本永惟稼穡之艱熙仁回四海于  
陽春至治保萬年于正午

又

伏以帝敬格玄歲展勤民之禱仙靈灑素時呈祐聖之

筵迎淑氣于先春兆休徵于有歲百神奉職萬宇承歡  
恭惟皇上德配二儀仁溥庶類勅天之命誠不替于時  
幾念民之依慮恒周于稼穡調八風于玉燭納屢歲于  
金穰安攘收内外之功信順獲天人之佑茲者玄冥在  
馭而四序將週微霰先零而三白未泮迺申虔禱載啓  
齋宮精禋特竭于九重牲幣徧修乎群祀惟聖誠之幽  
贊致天眷之昭垂膚寸興雲混合乾坤之色盈尺降瑞  
繽紛甲子之期棲太素于山川散靈滋于壠畝瑶林秀  
發氣不封條銀闕昭宣光惟承宇北陸風靜遠清萬里  
之塵南畝陽回普慰三農之望此誠上聖得天之靈貺

而至和育物之極功也臣等職聯密勿恩荷生成媿調  
燮之無功徒霑洪澤知感通之有道快覩嘉祥伏願景  
釐茂衍玄眷彌昌雨暘寒燠之各以其時九五位歛箕  
疇之福山阜岡陵之必得其壽億萬年迎軒筴之長

日當食不見賀表

伏以黃道開祥四國覩休明之象玄壇薦祐九重降昭  
報之儀唯志氣之交通見天人之相與照臨所暨忭舞  
攸均恭惟皇上握紀統天贊元出治乘六龍而有作保  
合太和馭萬象以無為獨存至正肅謀哲人驗禹範之  
庶徵文思欽明煥堯光于四表茲當久道化成之熙會

益昭至誠參贊之良能星鳥日中義和告朔伐鼓用幣  
馮相陳儀雖渾天之躔候有常而玄德之感通不偶非  
烟非霧競呈抱戴之華如盞如盤詎損貞明之體天垂  
顯命帝懋純誠爰啓齋宮肅陳明祀珪璧既備藹然昭  
事之忱忝稷非馨穆矣克誠之享百神受職萬福來同  
繼明照于四方人無不仰協範圍于七政天且弗違自  
有日月以來唯此最為曠典稽諸簡牒而上于古未有  
前聞者也臣等叨塵法從快覩清光就望傾心敢企駿  
奔之末纂述效職庸哀鴻瑞之編伏願陽德益亨天庥  
游至離明麗正式九圍于湯命新以又新豐大宜中撫

五辰于舜衡旦兮復旦

嶺南兵捷賀表

伏以玄宰眷德昭一王撻伐之威丹浦歸仁奏萬里廓  
清之績銷氛稷于嶺表訖聲教于寰中億姓騰懽傾心  
紫禁五兵載戢錫慶黃輿恭惟皇上德配希夷道超元  
始溥太和以育物萬彙同仁篤至誠以感神三靈協慶  
誕敷文德干羽舞於虞階克覲耿光戎兵陟於禹跡內  
寧外謐綱舉目張凡可致之祥由斯畢集自方外之國  
莫不來賓矧此海隅代為王土蠢茲小醜敢啓戎心竊  
弄潢池之兵嘯聚綠林之旅憑危豕突乘閒鷗張囊血



射天忍犯無將之戒揮戈指日自干不赦之誅爰整義  
師恭行天討旌旄焰野邁下瀕之軍容戈戟橫空奮伏  
波之威畧天奪其魄人厭厥兇彭寵憑愚其下盡為敵  
國夙沙負固執之不異匹夫渡瀘水以成擒時正臨於  
五月指鬼方而薄伐功無待於三年風靜龍川蕩蕩奉  
南金之賁星明象郡巍巍拱北極之居蓋有扈攸除適  
表王師之無敵而徐方既定益徵聖主之中興者也臣  
等久塵密勿之司莫效贊襄之略陰陽闔闢罔窺二氣  
之神功天地平成敢上萬年之景壽伏願鴻圖日固駿  
命天長陳周書之禮樂以熙文掩禹貢之山川而奠極

左日域右月窟凡有血氣之類莫不尊親超五帝軼三王自有天地以來于今特盛

駕幸齋壇賀表

伏以紫禁春融丕迓泰來之祉翠華時御欣瞻豫動之休璇杓轉而天迴寶祚凝而日固一人有慶萬國均歡恭惟皇上德合重玄神凝太素闢乾機闔坤軸與化為徒綏文教奮武功為民立命陽不愆而陰不伏八風之氣均調烏有鳳而獸有麟諸福之物畢至天庥既集帝敬益嚴正月始和叩瑤壇而受籙景躔初度演瓊笈以申虔煥開對越之儀懋欽平康之福乃御法盞而順動

式遵仙籙以言旋春滿九重知天顏之有喜筵迎萬歲  
卜聖壽之無疆誠昊穹錫羨之徵為宗社靈長之慶臣  
等恩深戴舜念切祝堯聞鍾鼓之音舉忻忻而相告仰  
宮牆之美敢翼翼以颺言伏願駿命維新鴻圖孔固如  
岡如陵如山阜永延周雅之禧曰壽曰富曰康寧嚮用  
箕疇之福

永壽宮增制工完賀表

伏以天居邃密續百年貽燕之基帝制增崇壯一代興  
龍之典睠此制作之大備允惟繼述之特隆棟宇生暉  
臣民快覩恭惟皇上凝神淵默體道希夷宅土之中巍

巍而建，有極得天之統，蕩蕩而奉無私以仁育民。洪庇  
丕覃于大庾，自義率祖耿光時，覲于羨墻，顧茲永壽之  
齋宮，寔肇興王之景迹。龍飛白水，大橫開海嶽之禎虹。  
遠紫樞繁祉，衍天人之慶。雖靈賴已徵于大業，而弘規  
猶襲于侯封。屬帝居之有年，肆宸衷之在念，乃揆吉日  
式詔共工，既置闌以陳圭，亦考文而制度。井攢綺藻，鬱  
靈氣于雲霓。瓦次金鱗，激晶光于日月。旁連太液，邁勝  
麟洲。上應鉤陳，增輝鳳掖。式備一王之令典，用昭百載  
之曠儀。蓋惟肯構肯堂中，孚攸發，是以美輪美奐，大壯  
聿形。莫宅毫之居，寔賴中興之令主。考斯千之室，亦惟

有道之曾孫在振古而如茲迨于今而為烈者也臣等  
叨塵禁近久荷恩私承夏屋之渠風雨敢忘帝力奉細  
旃之燕尺尋無補天工徒切悵懔有慚舊德敢同燕雀  
仰賀新成伏願保基孔固迓命維新亘地軸以宅尊車  
書萬國掩天紘而正位戶牖八荒導璿源于一祖七宗  
百世本支而有赫綿寶筭于三皇五帝萬年壽考以無  
疆

萬壽宮成賀表 二道

伏以昊春增新啓億載泰來之慶法宮載考壯百年鼎  
建之規庥禎茂集於一人歡樂均傳於萬姓康寧介祉

輪奐騰輝恭惟皇上道合元陽德涵太始向明撫運奠  
二極以成能居正凝圖歛五福而保極渥澤橫流於四  
國精禋昭契于三靈惠雨和風光調于玉燭岳珍川異  
旅貢于瑤墀屬帝載之維熙化成久道而天心之中佑  
錫羨維新乃眷宸居啓與宅之駿命是恢祖業隆肯構  
之鴻圖爰詔共工俾之經始群材鱗聚盡輸天地之藏  
兆庶子來共效斲遷之力千楹岳立屹中天百堵雲  
興矗焉不日屆此六陽之盛際是成萬壽之仙宮氣正  
純乾昌候值乘龍之會象依大壯令模標翔鳳之觀順  
經緯于陰陽中通閭闔摹圓方于太紫外翊鉤陳式廓

幸新知日臨之孔通經營丕作覩民悅之無疆于以怡  
皇情而集群釐于以荅昊仁而承景貺百神競護懋延  
仙算之長五岳遙連益輦皇圖之固臣等職叨密勿恩  
荷生成黼黻王猷媿乏雕蟲之技悛懔帝庥敬申賀燕  
之忱伏願天保益隆玄休滋至同車書于萬國自東自  
西自南自北式瞻商邑之尊嚴膺曆數于千年如山如  
阜如同如陵永戴周王之壽考

又

伏以玄貺昭垂誕布維新之駿命紫宮肇建重凝永固  
之鴻基斗樞正四極以宅中曆算衍萬年而受祉天人

交聘遐邇均歡恭惟皇上淵穆含真希夷契道惟玄惟  
默握衆妙之元機乃聖乃神御百王之大統嚮離明而  
敷治皞皞乎與日俱新莫鼎命以承休巍巍乎配天行  
健肆熙化已霑于下土而精禋益致于高旻乃申滋至  
之休用衍方輿之慶時維首祚煥啓新宮百工執藝以  
倬功萬姓子來而趨事竒楨異榦盡輸山岳之珍靈雨  
祥風丕著神明之贊憲薇垣以叙制襲乾位以陳方廣  
厦雲連摩天倪而定則層檐霞舉拓地軸而開基美哉  
輪奐之光壯矣飛騰之勢增輝祖構婉勝天居不日考  
成方屆六陽之盛會引年申貺更詮萬壽之嘉名陽道



大享乘六龍而宅吉仙齡罔極撫萬象而膺圖自茲堂  
構之新永綏康寧之福竹苞松茂九重瞻天子之居川  
至日升億載仰聖人之壽臣等叨塵法從久荷恩私瞻  
黼座以傾心情有同于賀燕濡彩毫而作頌技莫效于  
雕蟲伏願玉眷恒新瑤圖益泰調洪鈞于七政而坤翕  
乾闢揔元會運世以迎長開壽域于八荒而海晏河清  
合畿甸要荒以保極

壽清紫極宮殿成賀表

二道

伏以宸居肇建壯九重輪奐之規昊眷申綏介萬載康  
寧之祐法象仰摹于列宿休徵茂集于一人紫禁騰輝

黃輿洽慶恭惟皇上神凝邃密極建中和爰靜爰清處  
合宮而繹道有嚴有翼開宣室以凝整帡幪化溥于垂  
裳堂構業隆于續緒殊方即叙異瑞咸臻廼者渙啓宸  
綸增崇壽域恢丕圖于有俶迓眷命之維新經之營之  
兆庶承風而競勸完矣美矣膚功不日而告成驚百堵  
之雲興恍千楹之岳峙丹雘翼翼承鳳闕以高驤華棟  
巍巍荷虹梁而矗立是稱駿業載揭鴻名宮曰壽清得  
一永符于乾運殿惟紫極函三上憲于天垣法駕轉而  
協百辟之懽翠華動而順六陽之吉宅中居正基宥密  
于穆清抱一凝和手馨香于冲漠百靈訶護萬衆歸依

是昭福祿昌熾之徵永惟宗社靈長之慶臣等遭逢有幸締構無能舞蹈彤墀頌禱敢同于賀燕瞻依黼座祝釐欲效于呼嵩伏願帝曆無疆仙齡有永永水朝宗星拱極四方承商邑之尊嚴麟遊數鳳在郊億載保殷邦之

嘉靖

又

伏以紫宮肇建宏規依北極之尊玄貺申綏璿曆衍南山之壽眷與宅而增其式廓保佑命而惟有歷年城闕生輝華夷溥慶恭惟皇上宅心恭默居德廣淵成能位天地之中贊化盡人物之性惟精惟一親二典于羹墻

作君作師納八荒于戶牖綜百昌凝至道既嚴軒后之  
宮規億載啓弘圖載考周王之室爰涓穀旦乃命共工  
揆景屬定之方中闢地據乾之正位使民以悅役未踰  
時荷神之休功惟不日蘭橈桂棟傍五鳳以橫空月宇  
星廊捧六鰲而奠極是稱偉構用揭微名帝座惟三秘  
殿仰摹于斗極乾元得一法宮永介夫仙齡際朱鳥之  
殷中撫翠華而順動葆順百祿凝純嘏于燕閒賓禮萬  
靈薦馨香于夙夜棟隆斯吉寢成孔安奕奕巍巍八極  
仰丕基之孔固葱葱鬱鬱萬年瞻佳氣之常新臣等叨  
從清班獲觀鉅典帡幪大厦莫酬資生資始之恩黼黻

洪猷敢上美奐美輪之頌伏願瑤圖日鞏芝籙天長億  
萬千歲而膺期祿位名壽浩浩乎與天無極五三六經  
之載籍文章功業煌煌乎如日之升

賜御食謝表

二道

伏以寢廟秋新時薦金穰之慶禁廬日近歲承玉食之  
頒吉蠲不匱于奉先好賜益隆于逮下臣等商羹分任  
素飧莫補于天工禹膳傳榮既飽難名于帝力荷陶成  
于天地豈云一飯之恩矢祝誦于岡陵願上萬年之壽

又

伏以帝畝垂珠迓天庥于有歲御厨炊玉頒神惠于先

秋爰登合穎之祥式致嘉蔬之薦眷嘗新之上品篤授  
粢之深仁臣等運際千年恩含一飯誓服勤而後食爰  
正席以先嘗伏願乃粒烝民如坻如壖而有獲惟馨九  
廟時萬時億以無疆

代謝御賜表

伏以漢臺率法叨分糾察之司虞典考成過荷便蕃之  
寵恩同戴嶽畏重循牆伏念臣章句凡儒刀筆末吏躋  
階二品久濫班行竊祿三朞有鰥歲月譬諸草木知涵  
雨露之仁如彼鷹鷂莫稱風霜之任自甘幽黜敢冀明  
恩茲益伏遇皇上體道握乾承休奠鼎皇極建則正朝

廷以逮百官帝德好生洽民心以及萬物三歲計治用  
亮天工四國是刑爰崇風紀睦茲一介錫以多儀中使  
傳綸輝生戶牖內庭頒錫惠越尋常醇醪分王府之黃  
封肥羜封大官之珍畜恩禮倍隆于晝日報稱寧罄于  
宵星臣敢不益勵初心誓酬靈造明五刑弼五教載褒  
從欲之風貞百度肅百寮用贊化中之治伏願聖躬天  
保帝道日升之紀之綱四海仰周王之壽考為律為度  
萬年陟禹迹之洪龐

條麓堂集卷之七

表二

擬唐張九齡進千秋金鑑錄表

伏以祥凝華渚流虹開誕聖之期義效丹書銜鳳獻興  
王之籙敢辭勞于縹帙用翊美于璇圖情切岡陵祝天  
莫罄心傾葵藿就日何能茲蓋伏遇○○○○剛健中  
涵文明外煥勲成出震揚武德之耿光化溥乘乾觀貞  
觀之大烈昭融動植日照月臨鎔冶華夷天覆地載肆  
和氣薰涵于四海而休徵絪縕于一人維八月之芳辰  
屆千秋之令節天降玄鳥月貫瑤光鳳紀方延吐奠堦



之靈葉蟾輪正滿散桂殿之清芬凡在垂紳俱申獻鏡  
品緣象制敬以物將臣九齡跡忝鵷聯耻素飡于畫省  
情同獸舞欣旅貢于彤墀爰搜青簡以成編誓竭丹衷  
而效薰鑪錘今古恍焉著蔡之垂辨哲興亡不但衣冠  
之正鏐鍊竝蓄表裏兼磨集九牧之金雖備物可狀乎  
魑魅鍊五色之石恐微勞何補于昊穹惟殷鑒之斯存  
冀堯年之有永伏願置之几席比以韋弦舉目而道斯  
存指掌而治可舉迓周王之壽考天保萬年撫舜旦之  
光華日新一德

擬宋宴貢士於迎春苑謝表

太平興國三年  
鄉試題卷

伏以運啓中天奎壁約千年之瑞恩覃晝日芻蕘承三  
接之輝登庸方步于瀛洲授粲遽蒙于內苑遘雲龍之  
景會揣分奚堪聽華旅之嘉章俯躬增愧臣等誠惶誠  
恐稽首頓首上言竊惟王者統天以出治爰崇顓俊之  
儀人臣藏器以需時載挹觀光之願蓋帝載恒熙于亮  
采而天工每奮于庶明是以虞庭勤側陋之求達四聰  
而下問殷室廣敷求之舉師一德以格天時逮成周益  
隆徽範三宅三俊聿嚴論定之規六藝六行式重賓興  
之典恩崇湛露備儀物于饗殮惠溥菁莪振紀綱于髦  
譽自叔世之道揆弗植而用賢之典禮猶存是以漢重

孝廉并四科以舉士魏立中正定九品以求材越隋家  
興進士之科暨唐室定明經之制驪黃牝牡空貽相馬  
之譏月露風雲何用雕蟲之技道因文病理器途殊情  
逐時乖君臣道隔天開皇宋五星肇聚于奎躔兆應文  
明千載欣逢于今日恭惟○○○○性妙安安學勤疊  
疊籙承開寶虞德克纘于唐勲運撫盈成文謨益光于  
武烈龍行虎步夙隆仁聖之占鳳舞獸儀坐致雍熙之  
化顧泰階已徵于有象而聖心尤倣于無虞迺者渙啓  
絲綸旁收薳菲臨軒賜問驚御墨之猶新負宸傳臚荷  
天香之入袖聖情不倦重瞳鑒別夫玄黃帝德無涯優

澤徧霜夫青紫敞迎春之上苑列夏屋之縹緲月窟薄  
瓊漿芳臭散性情之爽上方出玉饌俎脩雜水陸之珍  
飽德何言醉心無數彼周祖鎬京之宴難擅休風而唐  
宗顯德之筵詎稱勝美推食之惠至是極矣逮下之榮  
何以加焉伏念臣等恭藎散才簞瓢寒士海濱牧豕結  
白屋于雲間蓬戶囊螢望玉堂于天上焚膏繼晷寧免  
掛一漏萬之譏附鳳攀龍幸與拔十得五之選感風雲  
之際會魂搖鯨海之深依日月之容光恩戴熬山之重  
伏願始終典學寤寐求賢養賢以及萬民永賴由順之  
慶既濟而膺百祿懋承戩穀之祥安富尊榮一代莫鴻

圖之固親賢樂利萬年弘燕翼之規

擬宋置起居院於禁中命史館脩撰梁周翰秘書

丞李宗諤掌起居郎舍人事謝表

淳化五年

伏以接璇霄而啓署特崇二史之司對玉案以濡毫爰  
備一經之纂地既聯于邃密任宜簡夫才賢詎意恒流  
謬膺異命臣周翰等誠惶誠恐稽首頓首上言竊惟起  
居院之職本於左右史之規記言記動以詔來繁日繁  
時而傳信漢家有注似為官史之所修晉室以還每用  
近臣而兼領既更歷代尚闕專官後魏廼為之置員北  
齊復因而立省迨隋唐之文既備而郎舍之秩始分依

鳳掖以分曹併列甘泉之法從侍螭坳而記事預資太  
史之多聞顧遺風漸遠於三宗而餘範幾湮於五季熙  
朝肇建墜制聊修兩省綴負司存幸托外廷列署行勅  
徒關標寄祿之虛銜失建官之初意天居既述崇深之  
義何居日錄空聞紀述之儀久廢欲舉一王之令典須  
完累世之闕文帝制維新官常攸正茲蓋伏遇○○○  
○承天御籙執象臨人如綸如緯以敷言中矩中規而  
建極睿謀經武同萬里之車書深畧緯文興百年之禮  
樂游心經籍措世絃歌追淳古之休風修太平之壯觀  
乃采臣寮之請是隆紀注之官移院深嚴參鰲禁鷺坡

之直延英密勿草玉函金匱之篇凡言動之出于一人  
及政令之關於諸署上窮景緯下括輿圖內而民俗之  
澆醇外而裔夷之逆順典章制度析衷考古之規食貨  
兵刑損益趨時之用或日報或月報或歲報謀猷克集  
於盈庭為大書為特書為屢書義例俱存於授簡藏之  
石渠之署彞典足徵付之金馬之庭著作有據亶云重  
任端賴名儒如臣等猥以謏材謬塵華貫握丹鉛於史  
局寧兼五志之長探緼素於書林靡摠九流之要顧濫  
吹之已久慮策蹇之難前豈期內史之新銜復荷大君  
之異數上林借寵知附鳳之暉遙下里裁歌奈離蟲之

技盡志非幾於微婉責以屬辭文罔及于瞻詳俾之叙  
事何以述朝廷之駿烈何以揚明聖之鴻休遊聖人門  
實有難言之懼代大匠斲更深傷指之慙臣等敢不勉  
竭虛庸務遵寶錄辨不華質不俚發凡開柱下之編退  
補過進盡忠托始載陛前之筆期汗青之皆核庶衷赤  
之少安伏願帝德罔愆王言作命舉必書而書必法益  
增琬琰之光美則愛而愛則傳直擬典謨之盛

擬宋司馬光進資治通鑑表

元豐七年  
會試墨卷

伏以法古無愆明主道隆于典學博文有要人臣義重  
于格心敢辭汗竹之勤用致食芹之獻屬編摩之就緒



恭匍匐以陳辭臣誠惶誠恐稽首頓首上言竊惟裨益  
神智不外乎書考覈興亡莫先于古皇墳代遠事既謝  
于結繩紀載書傳文又繁于充棟欲得典刑之不昧湏  
及文獻之足徵粵思姬鼎東遷孔子筆魯國之史劉綱  
中否苟悅紀漢氏之書雖純駁之體弗沿而鑒戒之垂  
不異如臣矇瞽敢擬聖賢雖載筆功深未敢忘于寸管  
而操觚才淺終有愧于三長仰荷堯謨俯存殷鑒集班  
馬范陳之史小說不廢于稗官會紀傳表志之編冠歲  
必緣夫天統蓋自考烈而上時世遠則懲戒弗存爰選  
藝祖以來功德隆則纂述莫罄故起威烈戎申之歲以

訖後周顯德之終防名分之數以開端要天人之歸而  
閣筆中間若國統之離合若天命之廢興若夷夏之盛  
衰若君臣之邪正若君子小人之升降若錢穀甲兵之  
變更苟有裨于冕旒皆備存于簡帙分曹列館慙廩餼  
之空糜製序錫名荷奎文之載耀恭惟○○○○剛健  
統天聰明作則承一祖四宗之緒以親以揚紹三王五  
帝之休盡倫盡制風清桂海拓地軸以登皇塵斷玉關  
掩天紘而踐帝仁孚寧宇精誠協于商湯孝奉慈宮尊  
養隆于虞舜顧盛德已惇于淵默而聖心尤切于時幾  
謂古以證今將著龜之具邇而史以傳信苦條貫之繁

多知臣適用才疎更化罔諧于輔宰察臣窮經志切校  
讐或得于師資迺渙絲綸俾躬鉛槧伏念臣疎迂成性  
朴鈍由天初旅進于賢科繼叨躋于諫署端明冒寵已  
深玷于清班樞院辭榮恐厚非于公議感三朝之知遇  
會乏陶犬之勛慶千載之遭逢寔邁雲龍之會勉承恩  
命冀效涓私治亂備其本原亦惟晰矣美惡形于指掌  
無不瞭然七制三宗鼓鑄不遺餘力六朝五代陶鎔亦  
被兼收用竭耿耿之微忠上贊昭昭之天鑒雖螢烟爝  
火罔裨日月之光而越鑛荆鉛少濟鍾簴之用昔李昉  
奏太平之覽太宗不廢于日中而孫奭上無逸之圖真

宗亦置諸座右倘于萬幾之暇終始弗違即與二帝之  
隆後先相映伏願政惟守舊志切欽天進君子退小人  
用迓泰階之慶紓民財節民力式培豐水之仁三事鰥  
修行龜疇之五福五規交致綿鳳曆于千年將唐漢微  
勲抱慚于青簡商周耿烈再覲于丹宸矣

裕邸勸進表

伏以朝覲而歸禹子載承鼎命之凝曆數之在舜躬式  
繼離明之照睠此邦家之大典實惟今古之通彛天相  
熙朝代生神聖萬年啓運八葉重光迨我大行皇帝躬  
上智之懿姿纂累仁之隆祚克敬享帝久道化成有典

則以貽謀迪宣哲而昌後教惟殿下岐嶷天授孝敬性  
成典謨宗帝王之猷終始懋春秋之學薄海臣庶久矣  
屬心高廟神靈于焉眷德比有憑几之命俾承主鬯之  
傳衆志胥孚合辭勸進已塵露聽尚秘俞音竊惟神詔  
不可以暫虛天工豈容于久曠雖聖人之德固莫加于  
嚴父而天子之孝則尤重于承親是以臣等再此叩關  
期于得命情非可已理所宜然伏願懷社稷之永圖念  
宗祊之重事勉遵先志俯順輿情率百官若帝之初適  
正受終之典歛五福惟皇之極茂綏嚮用之休

皇帝即位賀表

伏以皇天啓泰正五始以開元真主御乾乘六龍而撫  
運光贊萬年之治統允諧四海之歡心宗社奠安神人  
閭懌恭惟皇帝陛下惠文成性精一傳心玉質金相知  
聖賢之必可及日姿天表仰帝王之自有真念始終典  
學于春秋亦寤寐思賢于夙夜德成教喻天與人歸纂  
祖宗積累之基遵父子傳家之典是履聖人之大寶實  
惟天下之至公繼照而溥離明下以建極于萬國正位  
而凝鼎命上以答眷于三靈鳳紀增長龜圖衍固月正  
元日時際亨嘉受氣含生物咸欣暢此誠佑命維新之  
丕慶而嗣服無疆之閑休也臣等遙迹堯階傾心舜旦

雲從龍風從虎幸當利見之期就如日望如雲倍切欽  
承之念伏願鑒天命之孔邇思先業之惟艱政圖厥終  
事必徵諸名實民與更始心恒周于閭閻稽祀典而禮  
三神奉祖訓以貞百度治功顯鑠復還商周虞夏之風  
聖算綿長永保山阜岡陵之壽

請立東宮表

伏以豫隆國本實培滋大之基再叩天闈未徹蓋高之  
聽大計允關於宗社深情均切于臣民佇瞻明兩之儀  
敢憚至三之請恭惟皇帝陛下神明御極慈儉膺符揚  
大烈而覲耿光丕承祖德嗣令緒而顧明命克享天心

幹運化樞脩舉政要圖惟艱大將萬目之漸張崇建元  
良宜大本之先定况襲休甲觀天垂赫赫之禎貳體宸  
垣人有顒顒之望既幽明之協贊豈謙讓之可辭顧未  
奉于明綸尚有稽于茂典攄衷申控得請為祈伏望皇  
上懷社稷之永圖念古今之通義仰遵列聖肇舉曠儀  
鏤銀榜以題宮式奠長男之位篆珉文而錫冊爰正儲  
君之名于以懌九廟之神靈于以答四海之瞻仰承祧  
守器分蚤定于繼明學禮誦詩教更殷于養正綿萬載  
無疆之曆同三代有道之長

皇太子正位東宮賀表



伏以乾元啓祚方快覩于龍飛震長承桃載貽謀于燕  
翼當地闢天開之始衍山暉海潤之休歡動臣民慶關  
宗社恭惟皇帝陛下神姿天挺聖故日躋膺帝王之正  
傳握符御曆纂祖宗之洪業觀烈揚光永懷克懋于儉  
勤善政必先乎仁恕賜札郡國吏預識其聖明布詔山  
東民思見其德化百工務矣庶事康哉念惟社稷之長  
圖貴定天下之大本是涓穀旦用建儲宮太極班朝肅  
庭紳而咸會少陽在列粲卷服以彰施珉冊昭文金符  
正號對峙黃麾之仗交輝青輅之旂考以官占見著龜  
之習吉告諸宗廟知祖考之居歆越無疆以惟休斯有

室之大競前師後傳迪三善以端趨春誦夏絃崇四術  
而立教用介泰階之祉式培豐水之仁臣等幸際熙辰  
樂觀盛典本支百世陳斯千似續之章純嘏萬年祝天  
保岡陵之壽

冊立中宮代在外諸臣賀兩宮表

伏以嘉禮備成式建四方之極徽音克嗣弘開百世之  
傳祚衍宗祧歡騰海宇恭惟聖母仁聖懿安皇太后陞  
下安貞應地恭儉垂風關雎進賢不忘于寤寐振麟啓  
聖濬發其禎祥尊養膺長樂之歡燕婉卜洽陽之吉中  
闈襲祉慈極增輝臣等職守藩維欣逢盛典伏願終溫

且惠長承思媚之庥既壽永昌丕引含飴之慶

伏以燕翼嗣庥載篤宗祊之慶鳳鳴協律式增慈極之  
輝喜動六宮懽騰八表恭惟聖母慈聖宣文皇太后陛  
下徽柔肅度勤儉宣猷誕啓元良光續中興之曆簡求  
窈窕於昭文定之祥錫祚胤于家邦襲休徵于堯簞臣  
等叨守外邦心馳遙賀伏願天長地久綏福履于萬年  
海潤星輝綿本支于百世

大閱禮成賀表

伏以鴻運天開式際同文之會鑒與時動載弘經武之  
圖九圍延頸以承風七萃傾心而捧日古今壯觀朝野

同歡恭惟皇帝陛下具勇智之上姿撫熙明之昌祚百  
年積累是興禮樂之期十世折衷備舉皇王之制美黻  
冕而享宗廟執琮璧以事郊祇儼和躬推賢宮親視建  
綱陳目既昭有燁之儀制治保邦猶切無虞之戒謂王  
業莫先于居重而人情多忽于承平非大加蒐練之方  
必坐致伍符之耗爰頒成命肆詰戎兵采唐虞之舊章  
修祖宗之故事乘天道以布時令數軍實而明等威羅  
列鉤陳環羽林之壘壁招搖華蓋轉斗極之分躔萬騎  
騰驤八神翊從鉦鐃震野五軍之衆無譁組練霞空六  
令之氛盡廓夏服繁弱巧力攸分鸞鶴魚麗風雲互變

瞻天綸之渙發頒帝賚之便蕃介胄生榮頓奮平戎之  
色卒乘競勸共懷挾纊之恩義問宣昭威聲丕振外消  
虜侮內折奸萌蓋遵周禮以習戎不數漢家之都試臣  
等叨承任使濫典韜鈴說禮敦詩謀帥真慚于郤縠知  
方有勇治兵矧媿于子文依日月之光華已無裨于螢  
爚奉雷霆之號令冀有效于鷹揚伏願恢無競之王猷  
立有常之武德外威內順用臻舞羽之休上清下寧永  
奠垂衣之治

加上兩宮尊號賀表

伏以長樂承顏茂介九重之景祿明堂惇典丕揚百代

之鴻名禮備情文孝無尊養一人有慶萬國同懽恭惟  
皇帝陛下紹祖丕基承天篤祐允釐帝載業業兢兢敷  
錫王猷平平蕩蕩三朝定省符達孝于周文五典慎微  
協重華于虞舜爰當百兩成將之始思酬兩宮顧復之  
恩顯號偕隆綍儀並舉捧琅玕而上冊仰綸翟以稱觴  
昭揭休聞極域中之大祇修色養享天下之尊茲蓋有  
大德必得其名而亦惟聖王能盡其制者也臣等恭瞻  
爍懿莫罄揄揚幸際明昌祇深慶忭伏願德教而陳之  
藝極愛敬而始于家邦作君作師而寵綏兆民式迓泰  
來之祉惟壽惟康而欽時五福永凝鼎定之休

命婦賀仁聖懿安皇太后表

伏以璇宮啓泰誕膺純嘏之禧寶冊登尊載舉推崇之  
典三靈胥慶萬國均懽恭惟仁聖懿安皇太后陛下德  
備含弘功侔持載乾行贊化華胥夙佐乎軒圖離照嗣  
暉文母有光于周道玆當嘉禮慶成之始寔惟慈闈燕  
喜之時乃續曠儀式增顯號範金鏤玉昭回雲漢之章  
鳳輦翟褕委佗山河之度珩璜比節袞冕稱觴德蕩蕩  
以難名孝蒸蒸而不匱妾等忻逢盛典欽仰徽音贊揚  
莫罄夫鴻休拜舞式陳于燕賀伏願福隨德厚壽與名  
齊養以九州視膳永綏于晨夕備玆百順含飴衍慶于

曾玄

命婦賀慈聖宣文皇太后表

伏以鳳占叶吉初嗣聖善之徽音燕翼承庥式舉尊親  
之令典宮闈相慶寰宇騰懽恭惟慈聖宣文皇太后陛下  
德蘊靜莊性涵貞淑盈昌致儆嫔美鷄鳴繩蟄徵仁  
鍾祥麟趾爰自慶都誕聖丕凝帝命之隆暨今京室得  
賢益表母儀之盛王化欣觀其正始皇情益切于承懽  
乃卜穀辰爰增顯號文從周典捧寶冊之輝煌禮上漢  
儀超璇宮而拜舞有聖人而為之子亶惟莫大之休以  
天下而奉其親赫矣無前之烈妾等被淑風于南國夙



欽慈儉之規觀盛禮于東朝幸際光華之旦伏願蕃禧  
川至遐筭天齊保佑申重永撫太平之景運子孫千億  
行開長發之休禎

箋

代賀中宮箋

伏以紫掖升華崇建六宮之範彤庭渙命弘開萬福之  
原位正長秋懽騰函夏恭惟皇后殿下星軒毓秀月馭  
儲祥塗山符佐聖之期渭水顯覩天之兆誕膺寶冊儼  
正宸樞王化始于二南皇風被乎九有臣等職守藩維  
心馳遙賀伏願本支百世蚤徵麟趾之祥壽考萬年益

衍龍圖之慶

露布

擬總督等官勦平倭寇露布

臣聞春兩秋霜昊天順成于庶物文經武緯王者永綏  
于四方故商音備而四氣之和斯調威令申而一王之  
靈斯大是以熙朝啓運溥海來王水天桂海之君月竈  
日窟之長莫不獻琛紫極執玉彤墀迨我皇帝陛下九  
葉重光百蠻益叙乾坤浩蕩日月光華蠹茲島夷敢爾  
稱亂始而狗偷鼠竊視民居以為倉庾繼而蟻聚蜂屯  
據海壖以為窟宅剗屠童耆血淪震澤之波焚蕩屢墟

烟漲餘杭之域百年貨賄之名區鞠為荆棘千里稻粱  
之沃野化作蕪葭自古草莽奸雄江湖劇盜其嘯聚之  
廣劫掠之酷未有甚于此虜者也皇上仁切民艱義嚴  
天討有赫斯怒用致厥罰廼命臣某假司馬之權秉中  
丞之節閩吳齊魯悉其韜鈴錢谷甲兵均其調度臣仰  
奉宸猷俯竭愚筭念此三江承平百載將罔諳兵人不  
知戰須仗八方之義旅始伸九伐之神威于是九合義  
師四達文告三吳百粵折衝防禦之兵以至象郡日南  
武陵疊溪之長俱荷百年涵育之恩奮千里勤王之氣  
莫不抱忠賈勇聞命先驅投袂登程荷戈指虜于某年

某月某日雲集大衆雷動先聲倭首其人欲竄則鰲鼉  
之既失欲戰則戈甲之不敌退保沙柵合三為一苟延  
喙息以日為年已廼樵採路壅饕餮不繼蜂毒蓄尾猶  
包禍心螳怒奮臂徒蠢弱骨隨該臣等禡社神祇督率  
將士感以忠義咸願枕戈明以賞罰不難蹈火遂于某  
月某日先鋒接則威著于倒戈後陣交而勢成于破竹  
于是鯨催鯢仆鼠竄鳥伏或投軀虎口自試于銛矛或  
墜身魚腹永淪于幽壑臣等謹申三令戒嚴再鼓士卒  
蓄怒薄林藪以窮搜將帥協謀夾山川而布陣斬獲賊  
首其人等若干生擒若干追獲若干執侯景于丹陽斬

盧循于海上烟氛廓息疏江海以行舟民庶謳歌理陂  
塘而藝菰此皆我皇上誠達穹窿仁覃動植是以神明  
幽贊將士輸勞用期月之訐謨殄腹心之巨蠹揚漢威  
于徼外陟禹跡于域中貫胸雕面重譯來王翡翠明珠  
方舟充貢中興之美侔德高宣而猶有耿光也臣等仰  
承綸命謬與樞司上藉九廟之寵靈且承睿算下賴萬  
方之效順兼揔群謀幸巢穴之蕩平冀穰秬之盡剪劉  
江制勝之奇于今為烈吳良備禦之畧自此聿修荷帝  
力以難名貪天工而豈敢臣無任瞻仰忻忭之至謹用  
露布以聞

致語

癸丑公宴致語

伏以翊北極以調元百辟式垂紳之化臨西崑而較藝  
群英承推轂之公屬金甌分二氣之中肆玉署薦多儀  
之享渠渠夏屋濟濟周行恭惟內閣元老相公文章山  
斗廟廊股肱翕日月之精英用標天柱匯嶽瀆之秀異  
是秉國鈞屈群策納之度中攬八方運之掌上賢建官  
能位事已操知任之大端食吐哺沐握髮益切蒐揚之  
盛意爰承綸綍竒東珪璋應九重側席之求極四海懷  
鉛之選蓬山咫尺拾珎登龍瑤圃清虛瑟琴肆燕暫下

九天之直用偕三省之歡鵲印騶輔冠裳孔赫旅殺旨  
酒藟豆有儀試觀坐上之嘉賓元是寓中之大老辰良  
地勝禮備樂和祥光貫列緯垣中式表文昌之瑞德星  
聚紫薇度內驚來太史之占某等分職梨園觀光蘭省  
寸衷歡切短唱聊陳詞曰蓬島清秋玳宴張緋魚金馬  
映垂楊玉隄布潤傳仙液丹桂飛香出禁墻天上夔龍  
虞宰輔堦前班馬漢文章鳳池鸞掖賢才出四海千秋  
樂未央

啓

上鄭王啓

二道

西山遊子倦翼思歸東道主人緘鱗來顧旁風上雨正  
虞即次之艱桂醕蘭餽乃荷充庖之饋迨既開夫琅牘  
爰快覩于瓊章穆若清風粲如列宿領意良厚為感甚  
深方驅車以載馳用肅函而致謝陳言不次賜鑒為祈

又

伏奉瑤函兼承珍貺黃初邈矣驚聞八斗之章朱紱紛  
如寔荷百朋之賚恭惟老賢王以國懿親為時大老淇  
園設醴邁楚國之好賢濮水鳴琴駕東平之樂善其曩  
經梁苑曾承漿饋之勤茲忝商衡載拜牋施之渥感激  
則極酬答何能爰貢纖絲用將薄悃投瓊瑤而報李敢



謂及儀遵澗沼以采芹所希通信

上瀛王啓 三道

伏承東牋揚藻驚聞銀管之褒在笥頒珍載荷緇衣之  
好寵非常典感不盡言恭惟老賢王茂績宗盟恪修侯  
度知為善之最樂每敬客而忘疲言念蒯生新叨麻拜  
吟成七步洋洋乎大國之風製備七裏纍纍然上機之  
錦顧慙辱質曷割殊仁裁而為衣即佩服于朝夕藏以  
為寶永護守于子孫敬附旋倅恭陳謝臆荒辭不肅  
覽為祈

又

伏惟桐封衍系椿圃增年國存帶礪之盟天保岡陵之  
筭備人生之上福為王室之休禎其久嚮懿風頻承渥  
寵邁茲景慶倍有懽悰捧兕觥以登堂雖莫效萬年之  
祝束衮衣而載篚敢遙伸一縷之誠所冀撫存何勝榮  
幸

又

恭惟蘭殿啓祥椿齡益算河山帶礪永承西土之封戶  
牖詩書茂享東平之樂德高天派名在仙都捧兕登堂  
阻趨陪于遠道承筐獻悃寄祝讚于長年詞靡心宣神  
隨函徃仰希鑒納不任悚惶

寄高相公啓

四道

伏以維嶽降神自天佑命五百載貞元肇會光贊龜圖  
六十年甲子爰週重開鳳紀星輝南極祥集東山緬惟  
相公神化丹青人倫冠冕川涸海注胸中藏萬斛之舟  
雷厲風飛掌上運千鈞之弩陶鑄衆象形色熙如鞭笞  
四夷方隅謐若世方共仰公未宜歸父老歡迎玉帶裘  
馬林泉悅豫竹杖扁舟豈云卒歲之優游寔係斯民之  
否泰即日晨集星紀旦啓桑弧洛下端明會耆英而方  
始東都公旦綏福祿以未央某久坐春風欣開盡城關  
河伊阻莫效鳬趨松栢相承願申兕祝敬專一介馳上

尺書東向崧高遡下風而再拜仰瞻台兆欽高躅以懷  
思無任凌兢仰祈矚炤

又

伏惟崧嶽生申極星見丙優游綠野人推捧日之功璫  
璨琅函星衍後天之筭籌添北海望重東山恭惟端公  
閣下間世挺生降年有永泰山北斗舉一世而為宗翠  
栢蒼松貫四時而不改龍蟠蠖屈乾闢坤藏霖雨既濡  
于域中泉石復擅于洛下竹間開徑邀河上之垂綸丘  
中鳴琴避山前之荷簣天惟陰騭福乃大來屬桑蓬之  
在辰煥箕翼而介壽朱顏玄首愈見其康寧紫府丹臺

方列其姓字蓋膺億萬人之所祝頌迨將八千歲以為  
春秋某懷德則深瞻室伊邇采芝苓為獻情倍切于斯  
時撰杖屨以從願有諧于他日敢憑魚素用代兕觥努  
力加餐黃髮所期于遠道遵時養晦蒼生方望于中台  
意匪辭宣神隨函往

又

伏以山甫生崧播四國于蕃之烈端明在洛續千春獨  
樂之遊溯風莫逮于冥鴻送壽祈同于青鳥是憑魚素  
用代兕觥恭惟相公百代偉人三朝舊德裁成一世而  
不顯其功綜貫百家而不名其學翩如威鳳之隱見寔

關乎天時豁若大鵬之逍遙自適于海運維二之日乃  
百斯年福履孔綏衍箕疇之嚮用老成侯在歸魯殿之  
靈光南有臺而北有萊月之恒而川之至其菲葑下體  
藉譽青雲葵藿微誠傾心赤舄東山可望幸寄傲于琴  
尊南斗聿瞻願齊明于箕翼柰關河之難越承筐篚而  
是將睠念緇衣敢脩上公之哀永言白首誓酬國士之  
知臨楮馳神開緘如面

又

伏惟絳綸秘閣方媿于續貂琳琅好音忽聞于寄鯉不  
覺楚然以喜乃敢率爾為言竊念某居闕下材枋榆弱

羽人不比數鬼且擲揄意或值有宿緣謬見知于宗匠  
不徒借以齒牙之論而且托以肺腑之誠藉是階梯超  
於流品二天戴德千載酬知遂忘鼯鼠之五窮思效鉛  
刀之一割豈憶風波驟起一行涉納履之田以至桑海  
全更再度感種桃之觀是用關東田之別業于此息心  
懷南國之佳人誓言携手所思遐矣將謂終焉寧知醫  
國之效足徵世且采籠中之藥君子之仁可愛人豈忘  
屋上之烏廼致無良叨此非據爰溯餘波之自寔惟賸  
馥所沾明恩莫報于瓊瑤華札更傳乎琬琰章甫是惠  
施重承筐緇衣之宜頒珍在笥摩頂放踵知報塞之為

難由子及孫誓感藏之無斃謹附鴻旋之便仰陳幣戴  
之堅伏願騎原增祺綏麟應瑞衣冠洛社慰四方宋相  
之思彛鼎邾郊莫萬載周邦之祐尺書可托敬溯下風  
寸誠難誼有如繳日

寄張相公及請啓

三道

伏惟首夏清和盛德在火宗周昌熾高嶽生申天惟純  
佑于國家公則無隆夫名壽祥開巖石喜動搢紳恭惟  
相公應名世期為生民表弼亮三世燮理萬幾運帷幄  
之籌玩虜于股掌正廟廊之笏措世于盤盂主正少而  
國不疑功則多而心不有黃扉休暇士罔覩其所為赤



寓清寧民相忘于德化天保孔固帝眷方新衮衣繡裳  
式瞻丕貺桑弧蓬矢載啓元辰百順攸宜福祿亦維綏  
矣五官俱恭精神何其烱然某叨在陶甄莫陪歡慶傍  
弧星而占象壽緯方明眎台極以傾心休符正炳周作  
保召作傳願永膺黃髮之期南有桑北有楊擬賡上丹  
臺之頌瞻依莫逮鑒照為祈

又

伏惟冠槐棘以策勲快覩鼎彝之烈修藻芹而薦信敬  
陳綺筵之儀乘朝野之歡娛借絲綸之暇豫一陽律呂  
動淑氣于黃鍾三省衣冠迓勝遊于赤舄遙正靜嘉

踐敢云夏屋之承瑟琴和樂且湛寔仰周行之示掃門  
以俟鳴鑾是祈甲館宏張願登歌于湛露上公至止行  
占象于德星企竚維勤寵榮莫既

又

伏以晉晝頒恩殊典茂迎于雞樹需雲列宴清歡聊效  
于鹿茸當九重錫眷之隆適一陽來復之始蠲吉穀旦  
假勝名園洒掃林亭所媿尊罍之衍逢迎軒蓋佇瞻瓊  
袞之華敢藉茅以拜下風希驅車而導先路成此一朝  
之饗用副隔年之期借耀維多陳詞甚慙

請呂相公啓

伏惟演異音於綸閣濫綴崇班陳需宴於瓊筵載承嘉  
典恩深推轂感切循衿欲報賜其何從徒誦言而罔既  
洵於是月某日敬修享禮少展謝悰退食從容願枉夔  
龍之武嘉賓燕衍庶諧華廡之鳴伏冀辱臨豈勝欣佇

賀馬相公啓

緬惟泥金報捷蘭玉紹芳常氏一經契深心於麟筆范  
家三傳苞竒采於鳳毛喜洽姻聯祥延善慶敢專一介  
先布片言媿我龍鍾映冰清于半子多君龐厚微槐蔭  
于二郎一舉而釣連鰲寔啓河山之秀再世而昌鰒鳳  
敢云門閥之光言不悉心楮用代面

請皆所陳公啓

四道

恭惟春風桃李青雲叨附驥之聲秋水蕙葭絳帳遂登  
龍之願十年道義恩重門牆萬里逢迎光依山斗感遭  
逢之非偶念聚會之難常敞城南尺五之天消秋仲二  
十之吉敬陳薄酌仰迓高軒希廻玉節之清光眷此青  
衿之小集寸陰尺璧音聆鹿洞之匪遙一眄千金德戴  
鰲山之彌重

又

伏惟問竒冀北幸師席之親承宣化周南悵仙舟之暫  
遠誓擔簦而靡及敢執筆以為言東臆非儀聊致用情

之享終食無隱願申請益之忱伏望枉重高軒增榮陋  
巷雖門牆邈矣無能為桃李之情而杖屨惠然尚可展  
蘋蘩之薦再三是不慊十一為期

又

伏惟龍門再接再慰廿年仰止之思駟野遙臨動千里分  
携之慕敢陳樽俎暫望宮牆東臆將虔媿勤渠于夏屋  
德音徼惠冀則倣于周行將緣避席之忱共效稱觥之  
願是消望日式迓春風

又

恭惟廿年道誼勤跂望于斗南千里門牆叨趨承于日

下幸憫見羨之思願陪終食之懽八簋將虔敢謂致饗  
于長者一言徼寵所希請益于先生十日為期寸衷獨  
至

寄陳公啓

門生夙荷陶鎔久塵華近懷鉛終夜刻鵠無成糜廩經  
年懸貺有刺遙承雲庇躋佐天卿貌難取人果何酬于  
氷鑑韻不適俗第增苦于簿書畏甚循墻慙深濡翼仰  
塵華贖賜誨有嚴願矢素心報施無斁緬惟河流廢徙  
漕運迤邐千里桑麻彌望盡為澤潴萬艘稔稻經年委  
諸泥沙國計非輕民勞已甚將興大役其如杼軸之空

欲息疲忙無柰咽喉之梗所求兼利必藉長猷乃吾師  
借重于此方是上天有意于今日竚觀成績聆口碑之  
具騰行受新恩見鋒車之遄召聊因來使布上謝言覲  
綏靡宣斗山如見

請虞坡楊公啓 八道

伏惟明良千載是生崧嶽之神壽考萬年敢獻兕觥之  
酒屬樞庭之暇豫勾蓬宇以光輝王謝門高幸繾綣于  
絲蘿之末召方猷壯侍談笑于樽俎之間效野人之意  
以獻芹借海屋之籌以算爵愷悌而受天福祿喜依今  
日之歡老成而為國典刑敬禱歷年之永消期十九獻

歲三千

又

伏惟六十年而週甲子闢新命于槐階八千歲以為春  
秋衍茂齡于椿圃靈承帝貺式副民瞻集人境之洪休  
納延未艾在吾黨之小子慶忭良多爰筮剛辰仰板嘉  
會松醪苓實敬陳二氣之華袞衣繡裳顯迓列仙之駕  
共攄燕臆迭薦兕觥極北斗南仰清光于維石人間天  
上增景福以如川貴止有輝豫鳴不罄

又

伏惟降神惟嶽興五百年名世之賢佑命自天膺六十



載增川之祉桑苞衍慶蘿附蒙暉  
暉玉鉉之暇辰乘金  
飈之爽令敢供桃實用效芹莖再拜而獻  
兕觥敬詎伸  
于酒醴百歲而垂鶴髮願永賴于典刑伏望  
惠枉前旌  
借榮下士降列仙之駕不羨凌霄停長者之車  
深慚負  
郭寸衷實切四日為期

又

伏惟嵩嶽降神長庚在旦荷天純佑與齡倍增  
凡在幘  
依曷勝慶幸謹擬月之既望敬治長春之酌  
仰扳永晝  
之懽望螭錦以承光共賞桂花于三五稱兕觥  
而上壽  
敢祝椿算之八千拱聽鸞音奚勝雀企

又

伏惟闕闕開勲光啓帶河之誓弓裘嗣美更奪橫海之  
標實惟海內之奇觀豈止鄉園之盛事葭葦借曜燕雀  
生歡列樽俎以陳虔鼓瑟琴而肆讌企瞻衮繡恭依几  
几之容迓續簪纓共羨穰穰之慶願言夙降敬此辰祈

又

恭惟神降嶽以翰周保定大來之祉火見丙而正夏宏  
開初度之期豐日宜中泰符有煒敢憑鸞信敬薦兕觥  
邀長者之車巧借圭蓬之寵迓列仙之駕佇聞鸞鶴之  
音食芹而甘區區一酌如松之茂永永千年爰卜十九

之辰是致再三之懇

又

伏惟斗北調元嶽啓生申之瑞極南獻壽星呈見丙之  
占天惟純佑國家公則多歷年所百官式序萬福攸同  
如松栢之相承願寔通于四海矧葭莩之有托祝敢後  
乎三觴敬蠲六甲之元辰仰迓三台之景從歡生苹野  
鼓永晝之瑟瑟慶衍椿庭擾長春之徭鶴頌言莫罄觀  
止為祈

又

伏惟荷風逆爽迎降嶽之元辰槐座凝禧沐自天之新

寵祇伸燕喜仰薦兕觥為春酒而介萬年願有祝于簡  
簡效夏屋而陳八簋敢自致其渠渠啟華以迎擇芹而  
淪袞衣至止庶瞻斧藻之光几杖以朝敬上松苓之壽  
十九惟候再三是祈

寄虞坡楊公啓

即辰崧嶽生申弧星見丙惟天純佑俾爾熾昌景福萃  
于一門嘉慶延于四海恭惟柱輔虞翁翰周方召謨夏  
益臯萬里長城一時大老悅詩書敦禮樂是長六卿聲  
律呂身準繩具瞻百辟當五百年而名世丕興圖閣之  
勲揔八千歲以為春載啓懸弧之旦黃髮兒齒袞衣繡

裳請觀膝下之芝蘭盡是人中之杞梓忠貞家法文武  
科名斑斕濟濟以稱觴金紫煌煌而充室昊天明眷人  
世全禧凡在章縫孰不雀躍顧聯門閥獨阻鳬趨是陳  
芹曝之儀用上松苓之壽五雲縹緲知望海之匪遙百  
祿駢蕃願如川之方至

代祁柳谷請楊公啓二道

伏惟師友淵源久托斷金之契兒孫姻婭更諧倚玉之  
緣惠承一諾之千金敢致寸心于萬里是用緘儀貢悃  
式宴締懽消二八盈魄之期假尺五近天之域永好寧  
忘于投李獻虔欲效于食芹依大厦之陰幸荷帡幪于

三世望長安之日何如酬酢于一堂戴德維深馳心孔  
邇

又

伏惟山斗傾心久欽雅望葭莩托蔭願借餘暉是攀一  
顧之榮增重百年之契筮今十有六日舉姻婭之嘉會  
假京洛之名園敢枉從騶主盟斯好琴瑟而湛旨酒式  
宴嘉賓蓬華而過高車深慚長者肯臨是冀仰控難名  
寄鑑川王公及請啓六道

伏以楓陛宣麻榆關開府陝以西周公主之秉旄撐半  
壁之天閭以外元戎制馬推轂授三軍之寄貌貅鼓舞

萬竈生春虎豹欽寄九關增氣仰惟舅翁悅禮樂而敦  
詩書胄仁義而櫓忠信藝林敷藻成七步之章憲部詳  
刑折片言之獄揚樓船而南指慷慨以淨波氛捲旌旆  
而北征談笑以却胡騎善謀善斷允武允文士懷挾纊  
之恩國有長城之賴帝心簡在衆論同歸諏吉日以建  
壇戒行人而授鉞玉關銀塞遙傳綏靖之猷葱嶺陰山  
坐運廓清之略河外三城久棄方資保障于韓公湟中  
雜虜時誑更議便宜于充國法玩而紀綱盡弛寒長而  
斥堠多踈欲成不世之奇功湏掃近時之故套雖則不  
調之琴瑟定用改絃有若欲漏之舟航先宜備絮是以

小范視廊延之旅旃裘膽寒光弼入朔方之軍旌旗色  
換夫豈權難豫設固知功在人謀况以元老之壯猷輔  
此中興之昌運饑食渴飲恩溥匪難雷厲風飛威宣亦  
易若少需以時月將有銘之旂常鎖鑰惟良壯萬里北  
門之勢干城作屏寬九重西顧之憂佇觀報凱于轅門  
行見賜環于台座西京燕喜衆歡虎拜之召公北斗調  
元更賴鷹揚之尚父其雕蟲占技待兔經時探緇帙于  
十年雖工何用靡鉛刀之一割酷似寔難蓬為矢而掛  
門端負幼時之壯志印如斗而懸肘後欣舅氏之雄圖  
葵臆恭摠菲儀陳賀緇衣將好遐馳上郡之思瓊瑰慚



珍倍有渭陽之慕其為瞻戀匪可名言

又

恭惟屏翰三邊折衝萬里士奮再鼓之氣驛傳三捷之  
書華夏威紆旂常勲茂功惟報賞既延奕世之恩爵以  
酬賢更首中臺之座典隆司勳勳動登壇仰惟舅翁眉  
絕代之英猷肩殿邦之重寄電馳秘略攬萬變于胸中  
雷動先聲運三軍于掌上念胡虜為天之驕子勢可折  
箠視卒伍若我之嬰兒恩同挾纊馬騰士飽令肅信孚  
含枚夜發鳴輦鼓于地中捲旆晨驅出將軍于天上五  
道並進十日為期迅霆裂石知掩耳之猶難勁弩觸機

欲瞬目而不逮衆如頽利倏已委于塗泥強擬郅支忽  
漫喪其首領穹廬鬼哭沙漠烟消壯士長歌入漢關而  
奏凱軍諮奮袂按周典而書勲露布來聞天顏有喜百  
辟動色而相賀九邊歛衽以推賢貪謂虜警數十年以  
來撻伐唯此為烈頓使塞垣數百里之外犬羊乃爾聞  
然功則稱竒賞斯從厚憲府帥寮無出其右者賢關登  
冑有所以後之豈惟疆場之光允矣社稷之慶其才慚  
酷似情倍欣如頌韋相之勲華詞謝盧生之麗贈文公  
之車馬器微泰國之珍敬用片言仰陳寸悃有時閒燕  
尚能敷為鐃歌鼓吹之辭他日編摩更當垂之金匱石

函之記瞻雲具牘計日達誠某無任忻忭馳企之至

又

恭惟正陽在令喬嶽降神慶衍槐階晝迓最長之景  
增蓬海晴添滋至之籌依恃維深頌言難罄造鷄日下  
幸隨撰杖之游酌兕觥前敢效躋堂之祝子姓兄弟咸  
在雖天涯何異故園壽富康寧備臻即人世有同仙境  
是消穀旦敬掃華門十九維期再三是懽

又

恭惟月臨維夏陰敷槐棘之庭天降翰周光啓桑蓬之  
旦睠仙籌之載衍屬宸眷之方新八座紆璣公卿在後

一觴奉兒子姓滿前豈惟帝里之壯觀實乃天倫之樂  
事爰敢灑掃庭宇瞻企軒車斲雲芝而薦長年淪澗芹  
而娛永晝有肥羜以速諸舅所希終日之歡控玄鶴而  
迓列仙願上後天之算歡衷倍切頌言罔宣薄敬斯申  
吉日維午

又

伏惟壽衍椿年祥開穀旦時萬時億集仙籙之茂齡至  
再至三備人寰之景福夏官九伐曳履班高韋氏一經  
簾金業裕是壯河山之閭閻更瞻門戶之桑蓬蔭曜維  
多薦誠倍切灑掃庭宇式迓軒車淪澗沚之毛百拜以

脩明信祝岡陵之算萬年而作典刑邁豆靜嘉瑟琴和  
樂外內子姓濟濟捧觴前後科名彬彬結綬奚止鄉園  
之勝事信為京洛之榮觀燕喜有儀令聞不已希乘永  
晝肯聚德星有酒且多願上公堂之尊如川方至衍添  
海屋之籌豈竚孔殷頌言莫罄

又

恭惟東山望重敷天屬意于蒲輪南極輝遙吉日徵祥  
于遂矢槐庭晝永椿圃年長寄目青鸞末遂一觴之願  
托情素鯉敬傳千里之音恭惟舅翁毓天精粹作民典  
刑齒德同尊是曰天下大老康寧以壽允惟平地神仙

當茲星見丙之辰寔惟嶽生申之旦姻聯執筆者集洛社  
之衣冠子姓舞班邁寶家之蘭玉一堂內弘開壽域百  
年間長駐春光甥某京國名園幸稱觴于往日鄉山結  
社阻撰杖于茲時讚頌心勞瞻依神往承筐是薦祇增  
衮繡之思戴岳難忘願上岡陵之算

寄楊本庵啓

二道

伏惟松蘿處附幸諧鸞鳳之占桃實春蕢式屆雛鴻之  
候婚媾維其言矣道里夫何遠而爰卜穀辰申命元子  
造舟河洛納幣門庭千里親迎願瑟琴之靜好百年締  
慶依閨閱之閑深顧此纈蒙未閑儀度總角而弁稱髮

方髻騎竹以嬉童心猶在所紆訓誨尚賴併懽宜室宜家示儀刑于閨閣以嗣以續衍福祉于宗祊受賜孔多名言莫既自欣種玉詎報投瓊

又

緬惟陽月發祥壽躔增耀屬德政維新之會惻然人仰祝之私渤海添籌岱宗現瑞芝蘭粵秀松柏齊堅凡在嫺親咸傾欣贊其躋堂酌兕莫陪賓燕之懽踴使緘魚敢頌仙垣之祉藉儀履襪表悃曝芹引目無涯馳神孔切

同州請楊介菴啓

伏惟匡衛騰輝曼映三台之次驂騶得路特超萬騎之  
先譽播澤宮惟生梓里敬借五侯之第用陳三解之儀  
鶚薦雲高載揚國士鹿鳴日麗式燕嘉賓春秋交冠于  
賢書共訝弟兄科第文武兼資于帝略更推父子勲庸  
四海一門千人獨步榮增倚玉念切登龍薄悃是申吉  
日維戊

代馮澤山寄前令啓

某無似濫與續貂深慙朽質遙承寄鯉仰荷仁風思軌  
轍之欲循念瓊瑤之莫報恭惟執事東吳鮑謝北海龔  
黃吐鳳詞林名高丹桂懸魚琴座惠溥甘棠聲流百里



之英政陟九重之最民士方欲卧其前轍而不才乃爾  
繼其後塵珠玉在旁覺穢形之可厭步趨莫效渺逸駕  
之難攀方思請益于玉音遽荷錫仁于瑤翰高情滿紙  
艷彩奪人銘鏤在心報稱何物仰藉休庇已于月之三  
日捧書辭闕夙駕在途倘蘭旆之非遙趨席有日念萍  
迹之不偶接武何堪情切臨函神馳望德陳辭再拜莫  
既寸心

寄羅念山啓

三道

惟兄司憲栢臺茂揚景績弼刑棘寺行著駿聲墨勅初  
傳輿情大協明慎庶獄暫資求天之久公保釐四方且拜

登壇之命幸趣騶駕迅邁燕京上眷九重側席之思下  
續二載聯床之話所餘緒語用副別牋

又

伏惟金秋氣爽銀塞清蓬矢桑弧屬降神之維嶽貞  
松喬石欣佑命之自天贊祝心長瞻依室遠承筐有悃  
爰致意于玄纁推轂何能敢抒情于冠綬所希海納無  
任冰兢

又

緬惟幕府集禧極垣現瑞靈椿八千歲序屬初秋仙桂  
第一枝系延昌裔居延萬旅歡忭攸同文昌六宮簡徵

伊始惟厚德懋綏夫福祿寔皇天純佑于邦家某幸附  
葭莩欣瞻箕翼關山難越馳遙睇于夏邦筐篚是陳效  
微虔于春酒仰希鑒納無任榮光

代柳谷請楊本菴培菴啓

伏惟締好高門幸荷極隆之眷緘情遠道敢陳不腆之  
儀必有芳筵斯諧佳會謹筮月之既望式陳籩豆仰迓  
軒車集京洛之名園序門欄之樂事鍾鼓而求淑女喜  
成兩小之緣瑟琴而樂嘉賓更覩二難之勝所希肯醉  
不異陪趨

請本菴元川作冰人啓

伏惟故國弟兄幸共縮日邊之綬天涯兒女敢勞繡月下之書諾重千金光增二姓歡言既叶惠好云初鷄酒問名媿多儀于禮席鹿革式燕假末曜于賓筵月滿闕良城隅卜勝青梅竹馬姻緣當兩小之暮春省夕闌冠蓋擅一時之盛其為榮賴莫可名言

請韓元川羅念山作冰人啓

借重一言主盟二姓姻好申締嘉禮造端敢用不腆之儀敬托蹇脩之使鸞占告叶方迓慶于盈門驄御肯臨更假光于執斧其為榮幸匪可名言

復楊中峯啓

伏惟藐爾寒門雖本軒裳之緒冲然弱息莫閑纂組之功辱紹介之駢臨煥盟言之申錫迨其吉兮鼓笙簧而肆宴永為好也翕琴瑟以成歡得人寔邁于南容幸蘭金之可結修睦有叨于東武慚葭玉之相依勉輒拜嘉對揚將命

寄本州應試諸生啓

四道

辰下丹敷桂苑黃滿槐達顧兔東生爭礪異生之斧聞鷄西嘯競先士雅之鞭緬惟諸君里選推賢鄉評論秀條山夜雨幾年勤苦螢窓汾水秋風萬里扶搖羊角國士于茲其邁矣邦人亦與有榮焉某等晉社闕情周京

寄跡平康走馬念昔遊若在目前咫尺登龍計今日當  
屬足下祇陳短牘併效蕪金所願拔翼西山立橫秋之  
一鶚垂綸東海掣戴岳之連鰲應茲奎璧之光發我河  
山之秀

又

辰下五緯臨奎兩河論秀千金市駿冀之北茲正其區  
萬里搏鵬圖以南今維其候緬惟諸賢懷玉需時下帷  
成道揚芬月旦名久擅于鄉評振翼風秋價定增于里  
選<sub>某</sub>等繫望桑閭企聞桂信着鞭酉歲曩慙我輩之前  
驅聯榜甲科請讓諸君于先路式陳菲貺用布芹私

又

惟時玉宇風輕叢桂飄香之候雷門浪湧巨鰲戴石之  
秋濟濟麟鸞氣衝霄漢師師俊秀慶毓河山粵惟諸賢  
人稱八翼之材天賜三清之路當龍飛首歲翊昌運于  
千齡正鵬奮長空搏扶搖乎萬里石經滿座輝延桑梓  
之墟玉笋成林光映芙蓉之鏡歌鳴鹿牲少牢已見聲  
馳藝苑躋高明脫凡近行看望重詞垣某等跡係燕雲  
心懸晉水忻聞盛事欲摳賀以無由爰餽常儀願垂情  
而賜納

又

緬惟吾郡代有經術之士夙稱仕宦之鄉垂史籍之輝  
仰欽前哲發河山之秀今覩群賢當三冬文史足用之  
餘屬萬里扶搖可乘之會雲衢獨步冀北之群是空日  
下聯翩河東之鳳競起復曩日科名之盛衍百年冠蓋  
之華文運方昌地靈益著僕欣逢嘉會言念昔遊吾黨  
成章已見斐然之可述後來可畏尚期卓爾之不群聊  
分王府之珍用侑雲程之費馳心東牘注目捷書

同鄉迎進士啓

即辰花滿杏園鶯遷柳禁風雲萬里已翻鯨海之波禮  
樂三千行獻鳳樓之賦河山增勝京洛傳芳壘稱梓里



之榮觀敬舉桂林之故事春風御道綵旂分燕舞之暉  
遲日曲江琴瑟侑鹿鳴之什冠簪集盛樽俎洽懽共忻  
年少之卽君原是故家之才子願惟夙顧成是晝遊